

## Ymgynghoriad ar Fil Iechyd y Cyhoedd (Cymru)

### Diben yr ymgynghoriad

Mae'r Pwyllgor Iechyd, Gofal Cymdeithasol a Chwaraeon yn cynnal ymchwiliad i egwyddorion cyffredinol Bil Iechyd y Cyhoedd (Cymru). Mae rhagor o fanylion am y Bil a'r Memorandwm Esboniadol cysylltiedig ar gael ar dudalen y Bil.

### Cylch gorchwyl

Ystyried—

- egwyddorion cyffredinol Bil Iechyd y Cyhoedd (Cymru) i wella a diogelu iechyd a llesiant pobl Cymru, yn benodol drwy:
  - ailddatgan y cyfyngiadau ar ysmegu mewn mannau cyhoeddus caeedig a sylweddol gaeedig a gweithleoedd, a rhoi'r pŵer i Weinidogion Cymru wneud rheoliadau i ymestyn y cyfyngiadau ar ysmegu i fangreoedd ychwanegol neu gerbydau;
  - gosod cyfyngiadau ar ysmegu ar dir ysgolion, tir ysbytai a meysydd chwarae cyhoeddus;
  - darparu ar gyfer creu cofrestr genedlaethol o fanwerthwyr tybaco a chynhyrchion nicotin;
  - rhoi'r pŵer i Weinidogion Cymru wneud rheoliadau i ychwanegu at y troseddau sy'n cyfrannu at Orchymyn Mangre o dan Gyfyngiad yng Nghymru;
  - gwahardd rhoi tybaco a/neu gynhyrchion nicotin i unigolyn o dan 18 oed;
  - darparu ar gyfer creu cynllun trwyddedu mandadol i ymarferwyr a busnesau sy'n cynnal "triniaethau arbennig" sef aciwbigo, tyllu'r corff, electrolysis a thatwio;
  - cyflwyno gwaharddiad ar dyllu rhannau personol o gorff unigolyn o dan 16 oed;
  - ei gwneud yn ofynnol i Weinidogion Cymru wneud rheoliadau i'w gwneud yn ofynnol i gyrff cyhoeddus gynnal asesiadau o'r effaith ar iechyd mewn amgylchiadau penodedig;



- newid y trefniadau ar gyfer penderfynu ar geisiadau i fod ar restr fferyllol y byrddau iechyd, i system sy'n seiliedig ar anghenion fferyllol cymunedau lleol;
  - ei gwneud yn ofynnol i awdurdodau lleol baratoi strategaeth leol i gynllunio sut y byddant yn diwallu anghenion eu cymunedau ar gyfer defnyddio cyfleusterau toiledau a fydd ar gael i'r cyhoedd; a
  - galluogi 'awdurdod bwyd' o dan Ddeddf Sgorio Hylendid Bwyd (Cymru) 2013 i gadw derbyniadau cosb benodedig sy'n deillio o droseddau o dan y Ddeddf honno, er mwyn gorfodi'r cynllun sgorio hylendid bwyd.
2. unrhyw rwystrau posibl rhag rhoi'r darpariaethau hyn ar waith ac a yw'r Bil yn eu hystyried;
  3. a oes unrhyw ganlyniadau anfwriadol yn deillio o'r Bil;
  4. goblygiadau ariannol y Bil (fel y nodir yn Rhan 2 o'r Memorandwm Esboniadol);
  5. priodoldeb y pwerau yn y Bil i Weinidogion Cymru wneud is-ddeddfwriaeth (fel y nodir ym Mhennod 5 o Ran 1 o'r Memorandwm Esboniadol).

## Gwahoddiad i gyfrannu at yr ymchwiliad

Mae'r Pwyllgor yn croesawu tystiolaeth am y cylch gorchwyl a'r graddau y mae'r Bil yn adlewyrchu blaenoriaethau ar gyfer gwella ac amddiffyn iechyd y cyhoedd yng Nghymru.

Dylai unrhyw dystiolaeth gyrraedd erbyn **16 Rhagfyr 2016**.

Os ydych am gyflwyno tystiolaeth, anfonwch gopi electronig ohoni i: [Seneddlechyd@Cynulliad.Cymru](mailto:Seneddlechyd@Cynulliad.Cymru).

Rhowch wybod i ni os ymateboch i ymgynghoriad blaenorol y Pwyllgor sy'n ein rhagflaenu ar [Fil Iechyd y Cyhoedd \(Cymru\) \(2015\)](#) ac yn dymuno i'r Pwyllgor ystyried eich ymateb cynharach (neu fersiwn wedi'i diweddarau o'r ymateb hwnnw) fel rhan o'i waith craffu ar y Bil hwn.

## Canllawiau



Ni ddylai'r dystiolaeth fod yn hwy na phum ochr tudalen A4. Dylid rhifo'r paragraffau, a dylai'r dystiolaeth ganolbwyntio ar y cylch gorchwyl.

Os ydych yn ymateb ar ran sefydliad, dylech roi disgrifiad byr o rôl eich sefydliad.

Gweler y [canllawiau i dystion sy'n cyflwyno dystiolaeth i bwyllgorau](#).

### **Polisi dwyieithog**

Mae'r Pwyllgor yn croesawu cyfraniadau yn Gymraeg ac yn Saesneg, a gofynnwn i sefydliadau sydd â pholisïau/cynlluniau iaith Gymraeg ddarparu ymatebion dwyieithog, yn unol â'u polisïau gwybodaeth gyhoeddus.

### **Datgelu gwybodaeth**

Mae rhagor o fanylion am sut y byddwn yn defnyddio eich gwybodaeth yn <http://www.assembly.wales/cy/help/privacy/Pages/help-inquiry-privacy.aspx>. Gofynnwn ichi sicrhau eich bod wedi ystyried y manylion hyn yn ofalus cyn cyflwyno gwybodaeth i'r Pwyllgor.

### **Manylion cyswllt**

Os hoffech siarad â rhywun am yr ymgynghoriad hwn, defnyddiwch y manylion cyswllt isod:

Clerc y Pwyllgor

Y Pwyllgor Iechyd, Gofal Cymdeithasol a Chwaraeon

Cynulliad Cenedlaethol Cymru

Bae Caerdydd, CF99 1NA.

E-bost: [Seneddlechyd@Cynulliad.Cymru](mailto:Seneddlechyd@Cynulliad.Cymru)

Ffôn: 0300 200 6565

